

Nalog supervizora o izmjenama Statuta Brčko Distrikta Bosne i Hercegovine

U skladu sa ovlaštenjima koja su mi data stavovima 8, 10, 37 i 38 Konačne arbitražne odluke za Brčko;

Nadovezujući se na Nalog supervizora od 8. marta 2000. godine, o proglašenju stupanja na snagu Statuta Brčko Distrikta Bosne i Hercegovine i Nalog supervizora o izmjeni Statuta Brčko Distrikta Bosne i Hercegovine od 26. marta 2004. godine, koji je imao za cilj da se poboljšaju efikasnost i kriteriji stručnosti Vlade Brčko Distrikta;

Naglašavajući važnost Statuta kao glavnog provedbenog akta Konačne arbitražne odluke za Brčko i osnivačkog akta Brčko Distrikta zasnovanog na principima vladavine zakona i demokratske vlasti;

Odajući priznanje vlastima Brčko Distrikta za predanost u radu u skladu sa Statutom i osiguravanje usklađenosti zakonskog okvira Brčko Distrikta sa Statutom;

Uvidjevši da je nakon pet godina implementacije potrebno prilagoditi neke odredbe Statuta kako bi se odrazio razvoj događaja u Brčko Distriktu;

Kako bi se nadalje unaprijedila efikasnost Vlade Brčko Distrikta;

Nakon konsultacija sa poslanicima Skupštine, gradonačelnikom i političkim strankama;

Ovim

1. donosim sljedeće amandmane na Statut Brčko Distrikta,

koji stupaju na snagu danom donošenja ovog naloga i objaviće se bez odlaganja u "Službenom glasniku Brčko Distrikta";

2. nalažem da Vlada i Skupština Brčko Distrikta preduzmu sve potrebne mjere kako bi se osigurala njihova implementacija.

AMANDMAN br. 1

Član 22, stav 1 Statuta Brčko Distrikta mijenja se i glasi:

"Poslanici Skupštine Distrikta (u daljem tekstu: "poslanici"), gradonačelnik, zamjenik gradonačelnika, šefovi Odjela Vlade, šef i zamjenik šefa Policije, direktor Uprave prihoda Distrikta, direktor Porezne uprave, članovi Pravosudne komisije, kao i javni zvaničnici koje imenuje gradonačelnik uz suglasnost ili odobrenje Skupštine podnose na uvid Skupštini Distrikta godišnji finansijski izvještaj o svojim ukupnim prihodima, izvorima, imovini i dugovanjima, kao i o prihodima, izvorima, imovini i dugovanjima bliskih članova obitelji, do prvog stepena srodstva, te o načinima sticanja istih".

AMANDMAN br. 2

Član 34, stav 1 Statuta Brčko Distrikta mijenja se i glasi:

(1) "Skupština donosi odluke tropetinskom većinom glasova od ukupnog broja poslanika u slučajevima kada se odluke tiču:

- a) Poslovnika o radu Skupštine;
- b) budžeta Brčko Distrikta;
- c) usvajanja i izmjena zakona Brčko Distrikta;
- d) izbora i razrješenja svih osoba koje bira Skupština, izuzev članova 30 i 55;
- e) saglasnosti koje daje Skupština na imenovanje ili razrješenje zvaničnika u skladu sa Statutom i zakonom;

f) prava veta Skupštine na imenovanja zamjenika gradonačelnika i šefova Odjela od strane gradonačelnika u skladu sa članom 48”.

AMANDMAN br. 3

Član 46 Statuta Brčko Distrikta mijenja se i glasi:

“Vladu Distrikta čine gradonačelnik, zamjenik gradonačelnika i šefovi Odjela.”

AMANDMAN br. 4

Član 48 Statuta Brčko Distrikta mijenja se i glasi:

1. Zamjenika gradonačelnika i šefove Odjela bira ili smjenjuje gradonačelnik na osnovu profesionalnih kriterija i isti odražavaju sastav stanovništva. Skupština Distrikta može staviti veto na gradonačelnikov izbor ili smjenu zamjenika gradonačelnika ili šefa Odjela trojetinskom većinom glasova.

2. Zamjenik gradonačelnika neće u isto vrijeme biti i šef Odjela. Zamjenik gradonačelnika pomaže gradonačelniku u obavljanju njegovih funkcija i mijenja ga u njegovom odsustvu.

AMANDMAN br. 5

Član 50, stav 3 Statuta Brčko Distrikta mijenja se i glasi:

(3) Gradonačelnik imenuje, proglašava imenovanja, unapređenja i razrješenja svih javnih službenika Distrikta u skladu sa zakonom i osigurava da oni ispunjavaju uslove kadrovskih propisa, uključujući standarde zapošljavanja, pravila ponašanja i rutinske procjene vršenja dužnosti.

Susan R. Johnson
supervizor za Brčko Distrikt
zamjenik visokog predstavnika